



掌故集

ル 5  
2482  
3



門凡呂  
號 2482  
卷 3

吳興掌故集卷之八

九靈山長徐獻忠輯

延州布衣吳夢暘閱

後學茅獻徵校

堂大名園類

吳興山水清遠雖介於江海之間而去之甚遠雖有  
南兵爭而及者甚少自漢以來避亂者居焉南渡來分  
列秀邸諸君子仕臨安者有幽寂之思競趨此為遺  
後之許故名園眾多且臨湖諸山多奇怪石一時誇  
尚幾與洛中相並弁陽老人所作癸辛雜誌多列為  
勝事子自嘉靖丁亥遊觀其間已餘二十年然未嘗

見一花一石之處豈當時宦士習染偷安之意而今之民窮地僻其勢有不能者乎亦其朴俗務本其力雖餘而不爲靡麗固其本素者然也然洛陽名園之感不覺悵然而發故著之以見一時之盛云

南沈尚書園沈公名介字德和仕宋爲兵部尚書荆湖置制使園在南城之內近百餘畝內有聚芝藏書二堂大池幾十畝中有小山池南立三大石各長數丈秀潤奇峭有名於時其後爲賈師憲所得賈敗獨此石臥沙中人謂石之妖者善敗人也至今其地有沈尚書橋雖其地分裂尚有遺墟可識

北沈尚書園沈公名作賓字賓王仕至龍圖待制寶謨

閣學士園依北城奉勝門外號北邨葉水心作記鑿五池三面皆水有靈壽書院怡老堂谿山亭對湖臺水心評天下山水之美而吳興特爲第一

章參政嘉竹園

沈氏晦巖園

南漪小隱

沈清臣晦巖園後爲章參政所得有地數十畝內有佳林堂懷蘇書院相傳坡守湖時常遊此其地本郡官之南園爲楊漢公所剏三園之一寶元中知州事滕宗諒所重建後歸李寶謨後又歸之牟存齋端明端明本蜀人故建岷峨一畝宮及碩果軒芳菲亭字

舫齋前枕大谿總曰南漪小隱  
倪氏園倪正父尚書所居今之月湖卽其處其園四旁  
皆水易以成趣

倪氏玉湖園倪公別墅在峴首之旁取浮玉碧浪合而  
爲名中有藏書樓極幽經鉏堂志中有所謂兼山者  
此地居兩山之中故因以名也

程氏園文簡程公許眉山人園在城東宅之後依東城  
水濠有至游堂鷗鷺堂芙蓉涇又一園去城數里名  
湖口有堂曰右居

丁氏園丁葆光之業在奉勝門內後依城前臨水蓋取  
萬元亨之南園楊氏之水雲鄉合爲一園每歲郡將

勸農還必於此艤舟

丁氏西園葆光之故居在清源門外前臨茗水築山鑿  
池號曰寒巖一時名士洪慶善王元渤俞居易芮園  
器劉行簡曾天隱皆有詩臨茗有茆亭或稱爲茅菴  
丁家

葉氏石林左丞葉少蘊之故居在下山之南正堂曰兼  
山榜曰石林精舍有承詔求志從好等堂靜樂菴愛  
日軒躋雲軒碧琳池又有巖居真意知止等亭其鄰  
有朱氏怡雲菴涵空橋玉礪石林之餘勝在此有大  
澗從圓證寺左流出經其居蓋湖中勝地出於天然  
者此爲第一

葉氏東園乃少蘊之族孫溥號克齋者所勑在湖城之東多竹石之勝  
李氏南園李鳳山參政本蜀人後居雪因勑此爲遊觀之地中有傑閣有懷岷其扁乃穆陵御書  
王氏園王之爵使君家於月湖之中規模雖小曲折可喜有南山堂茗雪二水之所會茗清雪濁略不相混  
畢氏園畢再遇承宣所葺正依迎禧門三面皆谿其南則正山在焉  
韓氏園距南關無二里昔屬平原後歸周氏名曰城南讀書堂萬松關太湖三峰高可數十丈  
章氏水竹鳴章農卿北山別業也

劉氏園在北山德本邨富民劉思忠所葺  
錢氏園在昆山去城五里因山爲之巖洞奇秀下瞰太湖手可攬也錢氏居在焉

孟氏園孟無菴第二子爲趙忠惠壻因居雪勑別業成趣

萬氏園倪正父云予嘗謂萬元亨公家便是仙境今試呼名畫畫仙境不過亭館山林竹石花木鶴鹿而已公家具有之非仙境而何但人在仙境中自不知之猶有他羨耳萬大以爲然豈獨萬氏雖吾小園人望之亦當以爲仙境也

俞氏園俞子清侍郎臨湖門所居爲之俞氏自退翁四

世皆未及告老各享高壽晚年園池之勝蓋衣冠之盛事也

弁陽老人曰浙右假山最大者莫如衛清叔吳中之園一山聯互至二十畝位置四十餘亭其大可知矣然予平生所見秀拔有趣者皆莫如俞子清侍郎家爲奇絕蓋子清胸中自有丘壑又善畫故能心匠之巧峰之大小凡百餘高者至二三丈皆不事餽餉而犀株玉樹參列旁午儼如羣玉之圃奇奇怪怪不可名狀大率如昌黎南山詩中特未知視牛奇章何如耳乃於眾峰之間縈迴曲澗蟄以五色小石旁引清流激石高下使之有聲淙淙然下注大石潭上巨竹

壽藤蒼寒茂密不見天日旁植名藥奇草薜荔女蘿絲紅葉碧潭旁橫石作杠下爲石渠潭水自此溢出潭中多畜文龜斑魚夜月下照光景零亂如窮山絕谷間也

趙端肅和王園後臨顏魯公池依城曲亂植拒霜號芙蓉城有善慶堂最勝

趙氏北園安僖王所建後歸趙德勤觀文其子春谷文曜葺而居之有東浦書院桃花流水薰風池閣東風一梅等亭正依臨湖門內

趙氏菊坡園新安郡王之業也乃分蓮花莊之半爲之前臨大谿爲修隄畫橋芙蓉柳夾岸照映水中植菊至

百種相望一水其宅在焉舊為曾氏極目亭人稱曰  
翁面曾家後趙氏扁為天開圖畫畫外其之半為之  
蓮花莊在月湖之東四面皆水荷花盛開錦雲百頃城  
中所無也昔為莫氏業後屬趙氏至子昂時猶寄情  
其中人殆不知為莫氏業也  
趙府三園俱在南城下處勢寬閒氣象宏大後有射圃  
崇樓壯麗尤特  
趙氏清華園新安郡王之家後依北城有林田二頃  
趙氏瑤阜蘭坡都丞之別業去城既近景物偏幽後有  
石洞深邃其家有法書刻為瑤阜帖  
趙王蘭澤園園頗宏大因規為葬地作大寺

趙氏繡谷園舊在秀邸後屬趙忠惠家一堂據山椒曰

雪川圖

趙氏小隱園在北山法華寺後有流杯亭引澗泉為之  
有古意經鉏堂志云自西門出十八里有法華寺寺  
側即趙氏小隱園庭宇潔雅其漱玉森翠臨巨澗蔭  
喬松水清見底游魚數十若行空中坐石上片時真  
所謂坐茂樹濯清泉者獨恨城關之阻亟返歸棹不  
能終日耳

趙氏蜃洞一洞窅然深不可測亦忠惠所有

趙氏蘇灣園菊坡所建去南關不三里而近碧浪浮玉  
景物殊勝山椒有雄跨亭

趙氏玉鑑園

趙氏慶源堂

趙氏梅園

張氏園

此四園在城外見經鉏堂志

林氏谿堂

楊氏水雲鄉

見丁氏園下

鄒氏園

向氏園

此四園俱在城內見經鉏堂志

予謂正壑必以本來面目為勝天然林麓而下有泉池

雖一無點畫亦足為好若徒采綴為奇則既失其本

意而勞神損力亦非達士所堪也其在吳興尤不宜

為此若具一艇逍遙容與於煙波之上四顧巖壑獻

奇競秀惟吾意所適不必登崇躡峻自有天然之樂

一二良朋贊嘯分衷竟日忘歸更為佳絕不然則平

泉水石雖有遺戒所及祇取智者一笑而已

嘉靖己亥長谷外史徐獻忠識

吳興掌故集卷之八



嘉慶己亥... 泉木... 一二... 俗... 然... 意... 一...

吳興掌故集卷之九

嘗去... 九靈山長徐獻忠輯... 延州布衣吳夢暘閱... 後學茅獻徵校... 蓋其古蹟類... 夫世無百年之生而有千年之蹟士君子託興夷遠... 委情周歷蓋有不忍泯忘者夫亦係諸其人也弔古... 感世之士寧無所感發耶昔王右軍與客登覽烏山... 輒慨然而歎曰百世之後誰知王逸少與諸君至此... 乎嗟乎後之視今猶今之視昔微言逸表誰不愴然... 思之述古蹟

烏程閣下生蓮花萬歲麻曰太和二年烏程閣下忽生蓮花方是唐憲宗中興諸道皆用兵而江南稍安息蓮本水產而生於閣下亦和氣所孕毓也春申君故宅辨郡志載春申故宅在烏程縣南二十五里卽下菰城新志亦以爲城邑皆非也按東坡隋書地里志黃州永安郡有永安城圖經謂春申君故城蓋非是春申之居乃在吳國今無錫惠山有春申君廟庶幾是乎又張表臣曰黃之永安爲春申故城蓋始封也後楚併吳乃請吳之故宮都焉然行相事未嘗去國所以有廟者後人作之也又史記楚封歇爲春申君賜淮北十二縣後十二年復獻淮北地請封

於江東因城故吳墟以爲都邑今姑胥城內西北隅四縱五橫之迹可攷則無錫已自不居況吳興非所封耶今所謂下菰城者蓋春申伐吳時築壘屯駐之處其四壁門可證又按春秋楚子重伐吳克鳩茲至於衡山今下菰城正在衡山之南其爲屯駐之處無疑矣

顓頊冢按顏魯公吳興地記云烏程縣境有顓頊冢圖經云晉初衡山見顓頊冢有營壘圖今予攷皇覽云顓頊冢在東郡濮陽頓丘城門外廣陽里中山海經曰顓頊葬鮒鯁二處之陽卽今溫縣地不知顏公何不深究遽信圖經之說

黃浦誌以爲黃歇所開故名殊非也按顏魯公妙喜寺碑內云寺前二十步跨澗有黃浦橋其源出自杼山西南五里黃檗山其澗因名黃檗澗其北出爲浦因名曰黃浦其傳譌之久乃以松江郡治南所流大浦東北出范家河者亦名黃浦郡誌亦附爲黃歇所開其謬益甚

卞山楚王神廟梁簡文帝作碑記之盛言事佛不殺則非項王矣湖人舊稱項爲卞山王或卞山別有項王碑自漢而來事佛不殺者惟楚王英耳雖荆王劉賈亦非事佛者卞屬故鄣爲丹陽郡管內爲荆楚之封耶或曰唐正除有項王蔬食文則項王亦或嘗事佛

者然簡文之碑未嘗一言及於項而正除之文不過因簡文之碑而附會蔬食之意也又江總卞山楚王廟詩末云英威言幾何此當爲項廟也

歐陽亭在烏程縣歐餘山之陽越王句踐之後受封此山之墟

沈亞之故宅在烏程西南二十里地名小敷山卽舊誌之福山見杜牧之弔沈下賢詩  
朱氏怡雲閣見石林避暑錄記圓證寺大松三十餘株夾道蔽日猶國初時故物石橋合諸澗經朱子怡雲閣之前其深處水面闊四五丈張文規所謂金碧潭者也其下流注朱氏子嵩之圃噴薄激射交流左右

去吾廬不滿三里

碧琳池按石林避暑錄云吾居東西兩泉西泉發於山足蔚然澹而不流匯而為沼纔盈丈許溢其餘流於外吾家百口汲者繼踵終日不耗東泉亦在山足而伏流決為澗經碧琳池然後會大澗而出旁澗取以灌園皆此水也兩泉皆極甘不減惠山而東泉尤冽珍珠泉在飲馬池之下平地居民以溉田可百畝

白雲泉在金蓋山北麓亦乳泉也見山墟  
瑤席池在道場山上

真珠泉在妙喜寺

烏程侯井在縣東北孫皓時所開

放生池唐乾元二年春三月詔洋州之興道泉山南劍南黔中荆南嶺南江西浙西諸道迄於昇州之江寧秦淮太平橋臨江帶郭上下五里各置放生池凡八十一所顏真卿作放生池碑又乞御書題額  
元張翥伏日陪吳興諸府公宴魯公池云芙蓉池上會  
羣公滿意華筵笑語中虹影連蜷山外雨荷香淡蕩  
晚來風歌催銀甲筍逾急涼入金尊酒易空我亦玉  
堂揮翰手題詩合在水晶宮  
相國池烏程令李晤誕相國李紳于縣署幼弄之歲墜  
於治廨之東池逾數刻若有物翼出因名  
蘇公潭烏程秋曹掾蘇許公頽釋褐之職兼戎務上已

節郡有角檝之戲司戎者乘小艇往來檢飭因覆於  
城南潭中俄聞空中言無損許公因獲出無恙後人  
因其貴而名潭為蘇公云  
貴涇浦在霽谿西南岸梁時蘇氏女遇五采龜而生女  
為陳武帝后因名  
太子匯在卞山東吳封孫皓之父於此而皓繼吳統因  
名其舊迹也地產楊梅  
釣魚灣在烏程西北三里都官郎中張先釣於此因附  
名  
花渚在梅谿鎮吳越征西將軍吳瓌居此而構花石甚  
麗因名

玉帶潮安吉銅山鄉許夫人墓前早晚兩潮高尺許  
靜蛙池安吉西常樂寺側蛙鳴聒耳開山肇法師翦紙  
蛙投之即止  
四龍湖安吉東二里龍清觀左吳越王以望氣者言此  
地有王氣使人鑿之忽有四鵠飛出化為四龍  
蛟龍池天目山東南瀑布下注數里蛟龍時見於此  
乳泉井長興鼓吹山下其色白煎茶甚佳  
玉寶泉長興西南六十里深廣皆二尺色紺碧味甘唐  
處士鄭遨與道士李道殷羅隱築室泉口號三隱  
金砂泉顧渚山貢茶院側唐學士毛文錫記云將造茶  
時太守具禮拜祭頃之發源清溢供御茶畢水即微

掌集九  
減供貢茶畢水卽減半造畢水卽涸矣唐貢茶水二  
金銀瓶宋初用一瓶其後茶與泉俱不供至元時水大  
發雖茶畢不減我朝惟供南京奉先殿茶耳  
月泉在武康慈相寺泉出石隙形如半月舊有披雲閣  
後易名清暑閣呂祖謙月泉疏云斷崖吐月纔出半  
規古磬涵星尙懷全璧久矣寶匱之廢遐哉玉斧之  
修護此寒清祓除氛翳名高詩社再傳和仲之符價  
重帝城復值文饒之運  
聖井長興東九里廣惠寺左有五井晉永嘉中陳氏所  
穿陳高祖初生時一井泉涌出家人汲以浴之後稱  
王爲聖井  
古蹟類

花瀨長興水口陸龜蒙云花瀨濛濛紫氣昏水邊山曲

更容邨

五亭唐郡守楊漢公立於白蘋洲一曰白蘋亭二曰集

芳亭三曰山光亭四曰朝霞亭五曰碧波亭見白居易

易五亭記

歸鴈亭宋孫莘老治湖時作於天慶觀中道士山宗悅  
乞名於東坡坡以歸鴈名之方是坡判杭州運司差  
往湖州相度隄隄利害因題曰蜀客南遊家最遠吳  
六山寒盡雪先稀蓋以白寓思歸之意

三癸亭在杼山寺之東南顏魯公以癸年癸朔癸日建  
陸羽因以三癸名之故魯公詩云歛構三癸亭實惟

陸生故

谿光亭在歸安縣前開禧二年邑宰鄭昭先建

六客亭在郡圃中李公擇爲守時張子野劉孝叔楊元素蘇東坡陳令舉會於碧瀾堂子野作六客詞後東坡與曹子芳劉景文蘇伯固張秉道會於郡圃繼作六客詞亭蓋後名也

鷗波亭在子昂故宅之左今爲旗纛廟

車蓋亭殷康所建在車蓋山

昆山亭柳惲建

五花亭唐刺史韋景先所建以唐選士用五花判事爲韋氏所建白故以名亭在峴山南麓

麗澤亭愛山亭俱在郡治治平三年張大寧建

雲泉亭在瑋市普賢寺

凌亭在長興懸腳嶺下建安二十三年孫權嘗捨虎於

此後沈法興將蔣元超與李子通戰凌亭卽此

左顧亭在德清餘不谿上孔愉放龜之處

明月亭在武康明月洲上

碧瀾堂攷堂乃書谿館中堂名也杜牧之佐宣城時來遊吳興爲書堂扁作書谿館詩劉長卿南謫時亦寓其中有作吳興自郡齋外凡治中別駕之廳俱名爲館惟書館以待過從之客歷千百年來館名雖泯而碧瀾之名獨存蓋重牧之也張廉有重修碧瀾記竟

不知其爲雪谿館在宋時陳堯佐題碧瀾堂云茗谿  
清淺雪谿斜碧玉寒光照萬家誰向月明中夜聽洞  
庭漁笛隔蘆花

西亭在吳興郡西二里烏程治南六十步跨茗谿柳憚  
天監十六年正月所建嘗與郡主簿吳均同賦西亭  
五韻後邑宰李清重修顏魯公有記宋天聖中縣令  
方仲弓改爲浮玉亭

夢馬堂紹興三年朱勝非卜地於吳興華嚴山嘉會寺  
前葬其母楊氏夜夢十騎入山留一馬繫於林中因  
請於朝改寺曰崇因薦福寺豕前起堂名以夢馬  
二吳讀書堂在花渚壤之後裔可幾知幾兄弟讀書其

中

叢桂堂在安吉東一里紹興閒朱三思三省兄弟叔姪  
一門赴南宮者二十有七人鄉里榮之以名其堂

東萊讀書堂德清慈相寺後有謝夢生記  
韻海樓大厯七年顏魯公修韻海鏡源於杼山因建此  
消暑樓在郡南子城上今四城惟南樓猶做蓋其遺也  
牧之佐宣城時來訪郡公崔元亮因題詩末云時陪  
庾公賞指崔也

浮暉閣賈收耘老所居在定安門內沈會宗詞云景物  
因人成勝槩無塵可礙等閒簾幙小闌干衣未解心  
先快明月清風如有待誰信門前車馬隘別是人間



閒世界坐中無物不清涼山一帶水一帶流水白雲常自在

茗谿漁隱云耘老水閣景物清曠會宗爲賦此詞阨與水閣相近同在茗谿南岸予有句云三閒水閣賈耘老一曲新詞沈會宗無限當時好風月如今總屬績谿翁

鎮湖樓在郡城南  
魚脯樓在儀鳳橋南埠之東昔歲貢魚脯於此修製至今爲魚樓界

金婆樓在魚脯之東金婆好道築樓以居遇異人得太乙養元之道後因尸解後有過洞庭湖者見之以隻

履寄回啟棺驗之相合

管公樓在金婆左子昂夫人管氏奉先樓也子昂有記吳城吳夫概築城於長城東二里名吳城梁吳均有吳

城賦

辛將軍故城皎然詩同李洗馬入餘不谿經辛將軍故城一首按辛敬順郡之將也刺史獨孤問俗於上元三年因寇亂遣辛築城金鵝山以防南寇三城三圻在長興東臨太湖吳王屯戍之地步列三城水列三圻

晏子城在安吉西北二十里晏子鄉吳地志云晏子娶吳王女築城於此至今耕者得黃金狀如菱角中有

齊字名晏子金事之有無殊未可辨但以晏子名鄉  
或有自也

四安城隋大業九年置鷹揚府於此而築城云名四安  
者吳興宜興故鄣廣德皆保障於是也

長城宮長興西二里陳文帝所居天嘉二年置於天寧  
寺後

隱安在菁山宋知州事葛勝仲別業也外有谿澗澱澱  
與釋贊能於此賦詩爲樂

釣臺長興西北三十里上有石壁如屏高五十餘丈陳  
高祖少時釣處烏程妙喜寺亦有何楷釣臺

清容軒在慈感寺鄞袁桷字伯長號清容居士與趙子

昂交讀書於此因名

愛山臺在郡廨內西北隅宋郡丞汪泰亨所建取坡詩  
尙愛此山看不足之句元張世昌有記

南園在定安門內宋寶曆元年太守滕宗諒因楊漢公  
五亭唐末廢爲倉乃於此仍築五亭鑿二沼以存其  
迹蓋亦漢公所置三園之一也

隱陽在安吉東銅山鄉相傳陶隱居曾居此

陸龜蒙別業在長興東地名陸匯龜蒙嘗仕爲吳興郡  
丞其家故在吳之甫里而置茶山於顧渚其自遣詩

可攷

孔姥墩在烏程西北三十八里見列女傳

千金墟在歸安東南四十里統記云吳王濞鑄錢於銅  
峴山而置庫於此

三碑鄉城南七都至九都是也漢有三費碑在此因名  
其路在烏程南七里昔王傑年十三鄰人胡氏築牆侵  
其界傑乃夜移籬退三尺胡氏慙亦退三尺遂通行  
路因以名之

白蘋洲考其名始於梁太守柳惲之詩至顏魯公爲郡  
始輯爲八角亭後楊漢公遂拓爲五亭至光啟中李  
師悅乃廢而爲倉宋朝以爲秀王大府至元泰定復  
爲倉李直方白蘋洲記乃謂吳江之南震澤之陰爲  
湖州已謬至云洲在郡城東南則又似列於城外洪

武中土人有作記者乃云在江子匯之西尤謬矣  
落石在安吉李衛公廟宋政和二年三月四日隕二石  
於廟成化十七年八月甲辰復隕一石於殿後因名  
爲落石山

七賢石在何山寺中寺僧移湖石於此狀如石丈故以  
名之皎然有詩

七石配七賢隱僧山上移石性殊磊落君子又高奇  
跋禪服宜壤坐客冠可墮夜倚月樹影晝傾風竹枝  
集質患追琢表頑用磷緇  
佚火玉亦害塊然長在茲

采菱渡石沈監運得異石於葉石林之廢圃刻曰采菱  
渡其陽字二行王摩詰石虛用中書皆有印文復刻  
摩詰詩於下方云采菱渡頭風起策杖林中日斜杏

樹壇邊漁父桃花源裏人家此輞川舊物立於采菱  
渡者有郡人陳潤祖記

李相石罇見峴山

二仙石壁在長興洛陽五代時高士韓必吳松煉丹於  
此錢王遣羅隱招之遂隱去

白石洞天一在武康計籌山一在長興八座山側唐韓

湘隱處洞與陽羨諸山通

石羅漢在安吉西南六十里香山寺

石匱在卞山東麓其高數丈相傳人不可開開必雷雨

大作

石板在天目絕頂以板計者萬疊今武康石有類此者

石屋在天目山中可容數百人

石倉在孝豐西四十里景谿其石突起如倉旁有小祠

東西石樓在孝豐西南淨竹院後

石麒麟在長興西北二百步大雄寺南陳始興昭烈王

明陵前高九尺

石磨見梅谿山

石鼓見夏駕山

石胡梯武康西南三十五里沈羲登仙之處

磨箭石在昇山西南半山間

石人在德清縣南戴巷谿濱或以為昔人隧道邑人呼

戴巷為石人頭竹齋沈羸詩云檢點行藏歲月同石

人頭畔且從容向來奉口谿邊月此夜乾元寺裏鐘  
陳朝檜在長興大雄寺殿前相傳陳武帝手植今江南  
各寺院有老檜者即託名爲陳朝檜檜何必陳朝始  
有之上海靜安寺檜亦其一也浮俗附會之陋大略  
相似

慶樹沈氏金鵝山之瑩麟士立祖德碑久而欲墮忽有  
樸樹生於龜腹盤根抱趾聳幹夾碑疑如工造因名  
爲慶樹見魯公碑陰記

雌雄木在東林山一開花不結子一結子不開花

銀坊孝豐之移風鄉古采銀處

仙人頂在烏程棲賢山之西葛洪煉丹處上有禪院山

下有石洞

火鑪頂在東林山上亦云葛洪煉丹之處下有九井井

東有仙谿谿口有龜潭鳳潭西望葛仙山甚近豈洪  
之迹不妄耶要之東林逼近人邨非道家隱迹處或  
因葛仙山傳會至此

項王走馬埒在下山

薤林在孝豐彭祖墓云其不種自叢生也彭祖墓豈應  
在此或錢姓子自相傳會耳

回仙祠宋沈東老名思字持正隱居東林山郡守祕閣  
陳誠伯以東老名其所居之菴亦因回仙之詩也平  
生有至行尊賢禮士聞於四方以藥十八味釀爲十

八仙酒以飲客一日有青巾道士自稱回山人欲求  
一醉相與論古今治亂佛老之說自日中至暮飲酒  
數斗語東老曰聞公能黃白之術未嘗妄用且多陰  
功此吾所以來也既而擘榴皮寫一詩過舍西石橋  
乘風而去有郡人劉一止回仙祠記  
李衛公廟在安吉唐武德中輔公祐據丹陽詔李靖及  
趙郡王孝恭東討一戰而擒之邑人感公之德乃於  
西山立祠奉祀惟謹歲或乾溢禱之輒應賜額封侯  
始於政和自侯而公始於隆興至乾道五年邑士民  
請封王爵以生前已有衛公之封非封王不足以隆  
報乃封爲輔世忠烈王見沈樞廟記

長興李侯廟宋潘丙潘壬長興南鄉人太學生也見史  
彌遠廢濟王不平因糾鄉兵立之事敗濟王遇鳩丙  
壬被誅因欲屠湖州彌遠夢中見李太尉求免遂追  
回大統制一城生靈俱拜李侯更生之賜長興至今  
敬事之

舞陽侯廟在武康上柏里按沈彬廟記謂樊噲故上柏  
里人從季母嫁沛人遂爲沛人云不知何所據松江  
沿海及吳淞江皆有神廟廟必以漢唐名臣鎮之如  
紀王廟卽紀信金山廟以霍光之類以鎮沿海水患  
然水旱疾疫閒有禱之而應者起於信心也

翔鳳林天目山東北相傳鳳皇嘗見於此因名見顏魯

公石柱記

漢沈戎故宅在武康東北鳳皇山捨為懷德寺宋治平間改為皇覺寺

漢錢林故宅在長興西子山

漢樓船將軍金曼倩故宅在長興金山

秦程林故宅在長興縣南程氏橋即古之善釀者

晉建威將軍莫核故宅在長興城山

晉南臺御史尚書令盛聰故宅在長興東箬谿盛灣

南齊祕書郎沈密故宅在武康西二百步建元元年捨

為齊昌寺宋治平二年改為證道寺

謝靈運故宅在烏程東南今為福田寺

施斌故宅在梅谿鄉今為樂平寺

陳武帝故宅在長興東九里光大元年詔立為天居寺

宋治平間改為廣惠寺

章皇后故宅在府治東北陳永定三年捨為龍興寺即

今之天寧寺

陳青州刺史管聚故宅在施渚上強邨永定中捨為上

強精舍

梁昭明太子菴在天目山有洗眼池相傳昭明嘗於此

讀書

梁吳均故宅在梅谿鄉青山

裴子野故宅在安吉永昌鄉

王文殊故宅在晏子鄉孝行里

蕭翼故宅在府治西北梁大同二年侍中蕭翼捨為寺

舊名寶勝宋大中祥符改為鴻禧

梁周弘讓故宅弘讓之弟弘政為安吉令弘讓結宇山

中在縣南三十六里

梁江州刺史錢道居故宅在長興西九里捨為清果界

梁駙馬都尉吳僧承故宅在長興東呂山

梁參軍駱祕道故宅在長興駱灣

梁水部郎沈著宅在德清南二十七里唐栖市大同二

年捨為永明寺宋治平閒改為大善寺

梁戴可先宅在德清西一里吳羌山之陰

梁青州節度使沈子真宅德清東三十六里一夕鐘磬

自鳴堂前井出入道光有龍騰空而去遂捨為八聖

寺

伍子胥宅在府城西伍林邨相傳子胥曾居此

唐崔元亮故宅在長興西崔灣

孟郊故宅在武康西二里地名孟宅保有井名孟井

吳言故宅在府治北唐中和二年捨為寺刺史王鸞表

請為景清禪院宋天聖八年改為天聖寺

吳越驃騎將軍吳頊故宅在安吉西半里捨為羅漢院

宋治平閒改為常樂寺

吳興地記所載陵墓誌不收錄具列於後



吳文帝陵

吳景帝陵

鈕皇后陵

已上俱在并山東北所謂西陵者

吳丹陽太守蕪湖侯太史慈墓

吳大將軍朱治墓

吳蕩寇將軍程普墓

晉侍中羅含墓

晉黃門侍郎潘尼墓

齊宣城太守王靈鞠墓

梁司空康絢纁墓

陳五兵尚書唐宗墓

已上俱在烏程

陳錢皇后陵

殷仲文墓

已上俱長興

齊中大夫朱安期墓在德清新市鎮唐元和十年鍾斯

染請於刺史薛戎移建覺海寺

吳興掌故集卷之九



因檢括諸散見及足迹所及以爲此編尙恨登陟未  
徧不足爲全書埃有聞見續諸其後

烏程縣山

蜀山

烏程東十里

湯山

高啟送徐賁蜀山幽居詩我因解轍遠辭京君爲修  
琴暫入城偶爾相逢春酒熟飄然忽去暮煙生山頭  
學嘯猶聞響世上留詩不寫名西  
欄煩詢張靜者年來著易幾交成

別鮮山

烏程東十三里

爾雅云小山別大山鮮郭璞注云不  
相聯也此山大小似近而不屬故名

冥四山

烏程東十七里在冥四  
圩俗因名之又名篠山

西餘山

烏程東十八里

輿地志云漢文帝封東海王搖之子爲顧餘侯卽此  
古有西餘寺晉咸康中大夫劉造夫婦葬此又名晟

山

昇山

烏程東二十一里

本名烏山以漢烏氏居此也後王羲之與客登之慨  
然歎曰百世之後誰知王逸少與諸君昇此乎遂名  
昇山顏魯公吳興地記云其上有吳均入東記漢書  
烏程有歐陽亭昔歐陽氏始封於此

張來儀詩昇山橫道旁秀色佳有餘雖微干仞岡層  
巒自縈紆右軍晉高士曾此眺郊墟苔徑存遺迹干  
載沒荒蕪想當登臨日俯仰凌入區放浪形骸外游  
目多所娛惜無登高作儷彼蘭亭書我思見其人臨  
風一躊躕

孺山

烏程東二十八里

漢徐孺子哭友人姚元起於此山下有孺子祠紹興

中重修江都唐法記

張來儀孺子廟詩晴明出遊覽南山一登歷上有高  
士廟淒涼倚空碧殘僧散已久客至空歎息憶昔漢  
祚衰朝野方奔迫遂辭東湖墅艤棹此山側高名懸  
日月千古留遺迹洪州有高亭吳楚千里隔側身西  
南望悲風起悽惻

戴山

鳥程東北十八里

譙郡戴顓遊居三吳衣冠之士與之遊者隨其所至

卽築室居之太守張邵素與之善爲築於此因名焉

顏魯公

亭詩旁瞻戴顓路蓋指此山也下

有明義菴

張來儀詩譙國有高士寄志在絲琴一聞王門召破  
琴絕其音傳昔居斯山井竈邈難尋至今草木閒清  
風肅虛襟子家依古迹結屋當東林擇里得所安懷  
賢思難任浮屠巧眩世廟廊冠其岑臺殿紛青紅僅

足供登臨誰能構芳宇蘋藻薦所欽相望孺子廟千古同此心

毘山

鳥程東北五里

當城北水入太湖突然獨峙吳興之水口也

壘山

一名隆山在城北五里

在鳳皇山東麓出脈里許平壤閒突起二阜上生五

色石英而紫英尤多

陳灣嶺

鳥程北十二里此下皆卞山北支

南石山

鳥程北十三里

北石山

鳥程北十六里

魚山

鳥程北十七里

卞山迤東發至湖邊獨此山有氣泡如魚鱗山形亦

類游魚過此則為黃龍洞

黃龍洞

烏程北二十里

此山怪石林立中一石最尊上大而末小危立如幢石旁竊洞深不可測歲旱禱之輒應云有黃龍居之亦林屋之別門也山谷書黃龍洞三字宋人題名處近有磨去易題其名者旁有祥應宮

東坡詩吳興連月雨金甌生魚蛙往問弁山龍曷不安厥家梯空上巉絕俯視驚一呀神井湧雲蓋陰崖垂蘇花交流百道泉赴谷走羣蛇不知落何處隱隱如縑車我來扣石戶飛鼠翻白鴉寄語洞中龍睡味豈不佳雨師少弭節雷師亦停搗積水得返壑稻苗出泥沙農夫免菜色龍亦飽豚豎看君擁黃紬高臥

玲瓏山

衛放晚

在下陰嵌空奇峻略如錢塘之南屏及靈隱櫛林有洞曰歸雲張有篆於石梁闊三尺許橫繞兩石閒名定心石旁有杜牧之題云前湖州刺史杜牧大中五年八月八日來又紹興癸卯葛曾卿林彥政劉無言莫彥平葉少蘊題名

章文莊公詩短鍾長鏡出萬峰鑿開混沌作玲瓏市朝可是無崎嶇更向山林巧用工

賽玲瓏

去玲瓏二里近沈氏抉剔為之因名沈家洞大率此山十餘里皆奇石也

元許德彰遊避洞云谿衲一窟貫中峰不費天丁斧鑿工未信武陵隨洞入直疑禹穴與天通蒼龍穩臥春無雨石燕爭飛夜有風巖底儻逢驢迹在便於此地覓張公

西陵山

鳥程北二里

吳太子和葬此子皓繼統追尊文皇帝陵曰明以其在西故又名西陵

鳳皇山

鳥程西北九里在下山東盡處

形如飛鳳故名俗名仁王山非是上有宋張常勝墓王安石爲之志山之東北有國初溫祥卿尙書墓

礪山

卽鳳皇南隔水小山山石可以作礪俗名爲礪山全無意義此原與鳳皇山相聯梁武帝因鳥山出天子之謠將吳興以鳥名山者皆鑿斷此其一也宋鮑照

有自礪山東望震澤詩或曰歸安西南六十三里自有礪山考歸安之礪山止可北望震澤鮑詩言東望此也

石斗山又名法華山

下有法華寺寺碑載樵者掘地得石函藏一童子舌不壞上生蓮華一枝故以名寺東有石鳴吳太史慈所葬太平寰宇記謂之石斗山僧皎然冬日遙和盧使君幼平綦毋居士遊法華寺高頂臨河亭一首唐刺史崔元亮張文規俱有詩

鳳翔山

在鳳皇山旁皎然同顏使君眞卿李侍御萼遊法華

寺登鳳翹山有詩在別卷大抵卽鳳凰山之右旁山也自此而西卽弁山矣弁之前小山名蒼山今考所謂法華寺者幾廢魯公碑斷棄荒莽中不堪讀矣

雞棲嶺

烏程西北十八里

蒼山

烏程西北十三里

卞山

烏程西北十八里

山廣百里雖四散各表為名其實皆卞也上多似玉之石卞和嘗於此采石因名後以山形如弁因或名曰弁產桃花石見皎然桃花石枕歌○上有楚王神廟見梁簡文帝碑○杜牧有葬進士龔軻墓誌○有宋朝奉郎尚書司封員外郎知安州軍州兼管勸農

事騎都尉賜緋魚袋餘杭張禱字聖休墓○有宋給事中劉一止墓○有丞相葉夢得墓

在圓證寺左

王母山

在南一支從圓證寺東葉石林墓前發出迤長者是也

千山

卞山南平地發起有我朝南平縣知縣陸崧墓其孫穩仕江西右參政時所改

白龍山

在千山南盡處前臨茗水

溫山

烏程西北二十里

吳興記出御莽莽卽茶也杜育莽賦云靈山維岳可  
產所鍾厥生莽草彌谷被岡茶譜謂初生曰茶既長  
曰莽此當是常茶非紫筍類也然烏程自來無上供  
之茶或御字有譌

亭子山 烏程西北二十五里

白鶴山 烏程西北二十六里

山石精好可為碑板江東記云員山石精好不謝

吳興卽此吳興記謂仙人姚紵化白鶴遊此因名

雙姑山 烏程西北二十七里

墓山 烏程西北三十里

戚家山 烏程西北三十五里

康山 烏程西十二里此下在龍谿南卽茗谿

山長九里○有刑部主事唐君樞之祖知福州君墓

在其首○按察司副使邵公南葬其東

棲賢山 烏程西十二里

上有石洞土有多種毛筍著稱郡中其北有都御史

張公永明葬父處

烏菱山 烏程西二十五里

石城山 烏程西三十里

昔烏程人嚴白虎於此壘石城與呂蒙戰至今有弩

臺烽樓走馬埒墓存焉



金斗山

梁武帝先建妙喜寺於此唐貞觀六年移於杼山

瓜山 鳥程西三十二里

目山 鳥程西三十五里

夾山 鳥程西九里

在夾山漾之南俗名雞籠山

蕭山

與夾山相迤及

下徐山 鳥程西南十三里

敷山 鳥程西南二十里

易說卦山之東曰莠此在福山東故名

福山

舊俗名小敷山談誌名福山與莠山相聯接唐人沈

下賢名亞之居此 見杜牧弔沈下賢詩 今為先人撫松居士墓

楊灣山 鳥程西南二十一里

徐山 鳥程西南二十一里

暮山 鳥程西南二十二里

在福山迤南其相對者為南暮山

已上九山皆郭西灣之小山突起平壤者也

九霞山 鳥程西南二十四里

即羅山之前岡與康山南首相及予之山房在焉於

此修吳興掌故集其右一坪子之母陸孺人葬焉山

俱瘠土不堪禾稻子種藥草茶竹聊以供旦夕而已

羅山 鳥程西南二十五里

與剎山相望尖聳如羅剎兩角故名其陰即名棲賢

本一山也

楓樹嶺 鳥程西南二十七里

羅山之西名朱陽即仙頂寺之後山又西為姜邨姜

邨西過脈處也自是而南為青山為剎山為趙邨

小剎山 鳥程西南二十六里

舌頭山

青山

剎山 鳥程西南三十里

嶺上有剎山關山之西即趙邨秀邨有墓

趙孟頫趙邨道中詩昔年干戈動風塵暗三吳長江已無險智勇亦難圖築壘依平山謀國一何愚楨榦羣林空遺阼莽工墟至今蓬蒿下猶有白骨枯天陰萬鬼哭慘慘荒山隅興亡自有數不敢問何如獨憐

九乳山 鳥程西南三十里

山有九峰如乳

杼山 鳥程西南三十里

高三百尺遇一千二百步昔夏王杼南巡至此故名

山有妙喜寺寺前二十步跨澗有黃浦橋橋南五十

步有黃浦亭為宋鮑照送盛侍御及庾中郎賦詩之

所杼山西南五里為黃檗山為黃浦所自出亦名黃

藥澗即梁光祿卿江淹賦詩之所寺東有招隱院其  
前堂西廡謂之温閣從草堂屈曲有懸巖徑行百步  
至何楷釣臺西北五十步至避宅城蛇此皆顏魯  
公杼山寺碑述陸羽吳興記中語也近日郡志譌以  
黃檗山在衡山之南又譌以妙喜山與杼山相去二  
里俱非也妙喜名寺梁武本以西南有妙喜國未嘗  
以名山也

司馬嶺鳥程西南三十五里

黃檗山見杼山下

雲巖嶺鳥程西南五十里

太平山鳥程西南五十一里

響山鳥程西南六十二里

曹家山鳥程西南六十三里

金安山鳥程西南六十五里

吳嚶山鳥程西南六十六里

吳興記云嚶燒田也吳氏於此燒山為田土民始有

耕山田者

峴山鳥程南二里此下俱鳥程南境傍官澤者

山之首見者曰峴舊有五花亭五花判事本出於韋氏韋氏三世為守於

此故以李相石樽李相素喜飲名此自節所飲止一石樽也魯公聯句者

二十九人公之二子亦與焉內劉全白先以評事遊

湖後貞元為守裴循為長城尉吳筠入嵩山為道士

來此李萼先任殿中侍御史魯公辟為防禦副使左  
輔元先因公刺撫州增廣韻海至五百卷至是來湖  
三教俱集且不遺後進公之襟度如是真可謂之雅  
集惜未有勒之石者近時亦有諸大夫林居者社集

浮玉山

烏程南  
五里

徐賁浮玉山詩浮玉山前路樓船泊渚沙蘋香風際  
草杏色雨前花閒鳥兼湖淨游絲趁岸斜不因來此  
處那得賞春花

車蓋山

烏程南  
七里

晉太守殷康建亭於此趙孟頫葬其父與嘗於此

九里山

在車蓋之南

鮑山

與九里山隔道場浜口俗以鮑叔牙遇管仲於此附  
會不經之甚

宋曾鞏鮑山詩雲中一點鮑山青東望能令  
兩眼明若道人心似矛戟山中那得叔牙城參政張  
翼子都御史張廉俱葬此山西面

道場山

烏程南  
十二里

唐中和閒如訥禪師得道居此頗著靈異建伏虎道  
場後吳越王建十聖殿始改為真正寺宋改為護聖  
萬壽禪寺山巔浮屠見朱彧萍洲可談云熙寧癸丑  
先公登第天子擢居第一為權臣所軋改居第二大  
父頗不平道場山老僧言此非人事道場在州之離

方文筆山也低於他州故未有魁天下者僧乃勾緣  
卽山背建浮屠望之如卓一筆旣成語州人曰後三  
十年出狀元矣其後大觀賈安宅政和莫儔相繼爲  
廷試魁

東坡道場何山歌道場山頂何山麓上徹雲峰下幽  
谷我從山水窟中來向愛此山看不足坡湖行盡白  
漫漫青山忽作龍蛇蟠山高無風松自響誤認石齒  
號驚滿山僧不放山泉出屋底清池照瑤席階前合  
抱桂入雲月裏仙人親手植出山回望翠雲環碧瓦  
朱豐縹緲聞白水田頭問行路小谿深處是何山高  
人讀書夜達旦至今山頭問行路小谿深處是何山高  
今廢學不歸山山中對酒空三歎

何山烏程南十四里  
山以何楷所居得名故有何楷讀書堂山有僧寺寺  
石爲安定先生墓元初佛教盛行僧徒無忌乃踣其

表而夷其道會至正閒經界法行總管郝公鑿始復  
之洪武初遣使度民田僧乘計帳未定復詭墓爲寺  
地四明孫公成知縣事發其姦復加封樹因上其事  
於朝遂著爲祀今有張羽記及牟應龍郝侯祠記

蘇軾何山詩云今古何山是勝遊亂峰縈轉繞滄洲  
雲含老樹明還滅石礙飛泉咽復流徧嶺煙霞迷俗  
客一谿風雨送歸舟自嗟塵  
土先衰老底事孤僧亦白頭  
王十朋何山詩去秋遊道場俯瞰何山路林泉雖在  
眼未暇飛杖屨塵埃汨城市遙望隔煙霧春光忽已  
半播穀催農務欲作下山行偶逢風伯怒肩輿出城  
南乘輿訪幽趣山藏佛屋深迹躡陳朝故老松不記  
年修竹莫知數鳥鳴說法池花落樓禪處書空何處  
是歸誦  
蘇仙句

金蓋山

烏程南十二里

郡志譌以為即何山何山與道場联接為北一支金蓋是南一支汪藻作讀書堂記云東曰道場西曰何山金蓋故在道場之東南自不容混其北麓有泉山多雲氣名曰雲泉其南面有尚書閔公珪墓誌又譌指為衡山

軻山 烏程南十四里

金蓋北出小支金蓋如車而軻附其旁也

衡山 烏程南十六里

金蓋東出過官澤水只為衡山 衡作橫諸山中惟此山橫列故名 魯

襄公三年楚子重伐吳克鳩茲至於衡山只此俗呼金蓋之南面為衡山此為東衡山誤也

錢山

從衡山北出為錢山

元黃滔錢山望菰城詩云所欣漁樵居乃與緇錫并種竹有萬竿結茆無十楹老僧解人意蹤履能相迎芳草被行徑朱藤暗巖肩蕭條空階暮日照莓苔青猶嫌所歷卑未極遊眺情

潘塘山

從錢山北出為潘塘山北臨碧浪湖東只餘不谿也

西塞山 烏程南二十五里

西塞久無定論唐詩紀事謂陶現至西塞山下泊舟吉祥佛舍郡志乃謂嚴尚書震直墓在西塞山皆以郡城之西言之新志又以城西南之二十五里則與妙喜相近尤非劉孟熙以為磁湖鎮道士磯即張志

和所謂西塞山前者也此當有據故經鉅堂志云西塞郡城南一帶遠山是也山水明秀真是絕境其謂之西塞者下菰城爲屯兵之處坐西向東故也然謂之前則不必在山下近菱湖處是已

平峰山 烏程南三十二里

姑山 烏程南三十里

吳幹山 烏程南三十里

費家山 烏程南三十六里

石頭山 烏程南三十八里

谿東茅山 烏程南四十里

市山 烏程南四十里

菁山市上小山也

南陽山 烏程南四十里

白虎山 烏程南四十五里

菁山之南右山也

葛仙山 烏程南五十里

職方圖志云葛仙煉丹之處在天下十有三烏程居其一上有丹竈藥曰

菁山

與葛仙山相聯菁者菁茅也宋高宗南渡駐蹕於常照寺故橋道尙存其東隴有秀王墳及清河郡王張俊墓宋學士牟子才墓

張來儀菁山石梯閣與方二彝徐士賁周二復夜坐  
詩云忽逢晦日驚春盡為俯高窗對夜分獨鶴夢  
西崦樹老僧定入上方雲泉聲落澗空中辨花氣  
穿林暗裏聞莫道暫時留愛賞移家終擬避塵氛

歸安縣山

施山 東五里

潘山 東六里

河口山 東南五里

喬木山 近河口

夏家山 東南六里

孟家山 東南七里

沈長山 東南八里

餘安山 東南五里

湖跌山 南二十五里

一名長超山有漢蒯子訓遺迹上有宇文公諒墓

東林山 南五十里

又名具錦峰上有浮屠下有祇園寺東老之迹備見

回仙觀下泉

謝家山 南五里

分水嶺 西南四里

桃花鴨 西南五里

震山 西南六里

礪山 西南六里

石門山 西南六里



頂山 西南七十四里

廉山 西南七十五里

母潭山 西南七十七里

馬鞍山 西南七十六里

山北屬武康

銅山 西南九十里

與安吉武康接境

龍池山 西南一百里

天泉山 西南一百里

獅子山 西南一百五十里

首枕大谿岡巒盤踞如狡狴北屬武康

方山 西南一百一十五里

其山黏埴多陶器北屬長興

莫干山 西南一百五十里

上有鑄劍池磨劍石北屬武康

侯石山 南六十里

鳳山 南七十三里

見山 南七十四里

濮山

見經鉏堂志以為可遊賞處

厥山 東南七十五里

入東記云吳有陸厥家於此

靈山 東南八十五里

含山 東南一百八里

山有淨慈院其巔浮屠其下多出筆工凡四方製筆稱吳興者皆含山人也

長興縣山

白石山 東南三十八里

穿石山 東南三十六里

夏駕山 東南三十六里

夏王杼南巡至此而名夏禹受成會稽因卒葬焉其後省方之轍相繼而至故武康之禹山烏程之杼山皆以南巡得名其上有石鼓鳴則三吳有兵故又名

石鼓山 王莽刻石山自此去書各異興為嶽州

嘉靖閒工部尙書安成劉公麟葬其父武略將軍贈

太僕寺卿蒼於此因卜居呂山

董魯陽 東南三十二里

贛船山 東南三十三里

石井山 東南三十二里

槍旗嶺 東南三十里

山多卓旗之迹

呂山 東南三十里

吳將呂蒙討山賊嚴白虎屯營於此

桃花山 東南二十五里

何石山 東南二里

茶磨山 東南二里

白鶴山 東三里

獨姥山 東三里

在太湖旁與烏程接界

羅浮山 東二里

陽烏山 東五里

上為陳朝陵寢

楊阜山 東五里

雉山 北五里

山形如郡王冠陽烏山自此生去唐名長興為雉州

者以此梁武帝以童謠鑿破諸以鳥名山者獨此山不鑿

隔山 北七里

爬兒山 北九里

山桑隴 北十里

郭轉堆 北十里

陳墓嶺 北十里

桃花隴 北五里

香蘭山 北五里

盧家隴山 北五里

藝香山 北二十里

義鄉山 北六里

晉太守周圯舉義兵平石冰陳敏等賊乃割長城西

鄉立義鄉縣於陽羨以此得名

鼓吹山 西北二里

陳文帝居鄉時縣令到仲舉聞縣後鼓吹聲則帝必

至因名

馬鞍山 西北十五里

伏龍山 西北十五里

地有姚姓者居因附會姚崇墓於此

雞籠山 西北二十里

菹中山 西北十五里

在忻湖之西

了日嶺 西北三十里

富鳴 西北三十里

宋熙寧中有富人徐隆居此

雷鳴 西北二十五里

箬峴山 西北三十里

孔堂山 西北三十里

橫玉山 西北十五里

米堆山 西北四十里

堯市山 西北四十一里

山墟名云堯時洪水居民於此作市皎然詩堯市人

稀紫筍多只此

顧渚山

西北四十七里

相傳吳夫槩於此顧望原隰可為城邑故名唐時其下有貢茶院旁有金沙泉汲造紫筍茶有司具禮祭始得水事迄即涸至元十五年中書省遣官致祭一夕水溢可溉田千畝賜名瑞應泉諸題茶山詩惟袁高一首有惜民愛國之意見文苑

大官山小官山

西北四十五里

顧渚左右諸山或為茶園或伐薪炭惟此二山林木深茂未嘗樵采故曰官山大山上有虎頭巖下有石門可往來張文規詩誰云隼旟吏長對虎頭巖

明月峽

與顧渚聯屬絕壁削立於大澗中流亂石飛走茶生其間者尤為絕品張文規所謂明月峽中茶始生是也

西顧山

西北四十九里

一名吳望山山墟名云闔閭登姑胥臺望五湖顧見此因名

赭石山

西北五十里

橫嶺岡

南川山

鳳亭山

斫射山

在顧渚山左

池子嶺

已上俱西  
北五十里

楊嶺

西北五  
十五里

徐嶺

西北六  
十里

啄木嶺

西北六  
十里

山多啄木鳥唐時吳興毘陵二守造茶會宴於此有  
境會亭白居易夜聞賈常州崔湖州茶詩境會歡宴

詩苑

見文

懸日山

西北六  
十里

西噎山

西北六  
十一里

澗泉北流而西向峻狹激射有聲故名

懸腳嶺

西北七  
十里

白峴山

西北八  
十里

楊店之水出於此會為合谿

五峰山

縣西  
一里

有松雲菴山巔有洗心亭陳博士虞寄有報德寺碑  
云四鶴齊飛五峰相映

白蓮山

西二里  
下同

為子山

南衡山

戍山

西三  
里

夫檠築戍城於此梁太守張嵎與沈峻皆於此築戍以捍侯景

靈山 西七里

嘉靖閒刑部尙書顧公應祥葬親於此山

大福山 西八里

這山 西二十里

閬山 西十五里

飛雲山 西二十里

中有風穴雲起輒散其下有飛雲寺有石泉沙渚松門竹巖之勝亦產茶

彭耆山 西三十里

巖山

吳時有白鹿見亦名白鹿山

烏瞻山

其上有釣臺

洞山 西三十五里

洞深三丈

彈子岡

金山 西四十里

大洞山

洞深險莫測中有石牀

青峴山 西六十里

多生竹箬終冬常青茶經謂啄木青峴茶味與壽州

同

蒼雲嶺

合谿之源出此

佛子現山

石閒山 西七十里下同

黃巢岡

菖蒲山

茅山

青陽山

青冬嶺

相玉嶺

三鷓岡

晉謝安墓遷於此

閔嶺 西一百里下同

龍目嶺

上有石巖中有二穴其光可鑑所謂龍目者也過嶺為廣德州界

南嶼山 西南一百二十里

四安山 西南八十三里

南華山 西南七十四里

望山 西南六十八里



巧石山 西南六十里

胭脂嶺

唐吳筠於此煉丹

牧馬岡 西南五十里下同

瑞芝山

八座山 西南四十里下同

在方山之南唐吳琪吳頊吳崧皮光業林升羅隱韓必何肅居此時號八友因名

方山

高四千丈南屬歸安陳文帝為信武將軍自長城遣二千人夜下方山津投京師只此山有大雲寺寺後

小池清可見底久雨不溢旱亦不涸因以清泉號其

鄉云

午山 西南十七里

餘干山 南七里

梁陳故事云梁武帝時童謠云王氣在三餘乃於餘干餘杭餘姚三縣為厭勝法陳武帝生於長城故有餘干山餘罌谿餘漁浦豈有天意乎

天井山 南三十里

銀山 南四十里

吳山 南四十里

吳王送女至此因名或曰梁吳均唐吳筠皆居此因

名

黃山南四十五里下同

常都山

青山南六十里

其中有石竇東通洞庭冬夏常暖山色如黛故名

吳均與施從事書云故鄣縣三十五里有青山絕壁千天孤峰入漢綠嶂百重清川萬轉歸飛之鳥千翼競來企水之援百臂相接秋露為霜春蘿破徑風雨如晦雞鳴不已信足蕩累頤物悟衷散賞

大布山吳均有采藥大布山詩

佛子現山又見西境

昔人見山有白光掘之得石佛數寸因名

白虎山

小兒山

安吉州山

青峴山東北三里

卽東晉山入東記云東晉欲立城於此

點燈山東北十里

下瀕大谿漁火時時照映故名

玉磬山東北十五里

又名崑山吳興地記云安吉有崑山攷之梁僧曇諦

卓錫於安吉東北十五里得一璞扣之有磬聲因名

玉磬山又以玉出崑名崑山

皎然兵後早春登故鄣南樓望崑山寺白鶴觀示清道人

易忘羈時得無倦春歸華柳發世故陵谷變擾擾陌  
上心悠悠夢中見蒼林有靈境杳映遙可羨春日倚  
東峰華泉落西甸鐘聲在空碧幡影搖蔥蒨繡想山  
中人神期如會面別離芳月積歧路浮雲徧正印入  
空門仙君依苦縣隳形舍籍紱烹玉思精煉事外宜  
娛白雲  
與黃卷

梅谿山 東北三十里

地多產梅凡烏梅佳者出於此其流水曰黃谿市之  
東多大山因泛名梅谿山也山根一石聳立高可百  
餘丈名石磨遇風雨則雲氣轉動如磨云其旁有石  
門中生石耳

青山 東北三十里

見長興

長盤山

在浮雲山下有宋樞副莊緯墓

純孝嶺 東北三十里

古桃志云黃巢之亂邑人石昂負母避此

浮雲山 東北四十里

上有七十二墩久旱生浮雲即雨

銅峴山 東三十里

高一千三百丈直鳳皇山之東

鳳皇山

高一百四十丈廣七里中有隱鳴云陶隱居嘗居之

閔頭山

有仙洞深五丈中有石碁枰

銅山

三山東南六十里

一水東南入烏程一水北至長興一水西北入州境

故名

白楊山

東南二十里

上有兩穴為采銅處

霧山

南十里

山多雲霧故名山下有寺吳越時建名祇恆寺宋治

平開改稱大明後改霧山寺

寇萊公詩青紅樓閣枕寒谿門外天垂斗柄低曉鳥不知春向背落花依舊水東西半橋霜月光相照一

帶松煙色未齊誰謂百年榛莽地香雲今日繞輪蹄

平目山

東南二十里

陳節婦都氏葬於此其子良謨舉進士仕至參政公生十月而父守謙卒力教其子以道義以至成立其節行不媿古人兵部尙書王廷相為表於墓

芝山

石馬山

南三十里

天上有洞洞陽龍池大旱不竭

石虎山

南十五里

有石狀如虎踞於道旁字豐出入之途

石鼓山

與石虎相屬下有谿其聲如鼓

仙人洞南四里

深三十二丈

天井山南五里

山半有潭深峻如井泉水傾瀉冬夏不竭

浮門山縣西南十五里

又名蜈蚣山

獅子山西南七里

落石山西三

山高二百五十丈廣五里時有殞石因名下有李衛公廟沈樞有廟記廟後兩廊宋魯伯能有記

金鐘山

與落石山相屬上有施將軍廟

董嶺水

唐周朴有董嶺詩見文苑

南華山西三十里

石門山西四十里

在梅谿之西吳均

吳均與顧章書云梅谿之西有石門山森壁爭霞孤峰限日幽岫含雲深谿蓄翠蟬鳴鶴唳水響猿嘒英英相雜絳絳成韻既素重幽居遂葺宇其上幸富菊哉花偏饒竹實山谷所資于斯已辦仁智所樂豈徒語哉

浮石山縣北二十里下同

濱於大谿其旁有石屹立谿中其上如蓋若水中浮出也

烏山

與浮石相並當兩谿之衝

石郭山

上產楊梅在六朝時以供御其山九隴狀如龍又名

九龍山上有石城其陰有石竇

湖南山

西北十五里

白石山

與湖南山相屬

郭公山

西北十里

上有郭文先生祠文居此山見一虎張口相向文視

其咽中有橫骨乃探去之後獲薦鹿之報其碑文曰

高山岵嶸峻瀨潺湲飄生林下雲興巖端先生存沒

安於此山

一懸崖長只短不測海風如怒此山

邛閣山

西北二十五里下同

邛閣者倉廩之異名晉史景紀言姜維寇狄道帝曰

姜維攻羌收其質任聚穀作邛閣訖而復轉行至此

○此山之形似倉廩故名

玉泉山

西北二十里

孝豐縣山

中許異說之魚當景晉時山有泉

天目山

縣西南六十五里

高三萬六千丈廣八百里其巔有仙丈峰千丈巖東

南有瀑布下注匯為蛟龍池東南一峰曰翔鳳林上  
有平地方一千五百尺東西峰各有天湖如天之兩  
眼故曰天目湖中有異形之魚當是潛龍也產有龍  
鬚草靈壽藤

天目東峰從臨安入疏豁可行高峰和尚道場在焉

趙孟頫有大西峰從孝豐入深僻不易皎然有題張  
覺正等寺碑

西峰上有十二潭為龍神所都人往稍深只有風雨

雷電或雲氣一縷稍見只致不測或旋風吼怒此出  
之靈氣也山中寒氣早嚴山僧至九月即不敢出冬  
來多雪三月後方通行上有紫陽觀梁大同五年建

昭明太子勒碑記當時恩獎之盛旁有石室可容千

人

東坡聞唐道人言天目山上俯視雷雨每大雷電但  
聞山下如嬰兒聲因作詩已外浮名更外身區區雷  
電若為神頭只作嬰  
兒語無限人閒失箸人  
元張來儀詩東西峰對峙麋鹿日成羣四月猶飛雪  
半山長是雲洞香仙藥徧天黑聖鏡分千古錢唐勝  
登臨愜  
素聞

佛子山 西南七十里高二百丈風三十里鐵背苦其刻

吳興記云山有石室中有小石莊嚴不倚儼然如佛

亦名  
佛嶺

柴山

高七十二丈見括地志

桃花山 西南五里

桃花石出於此唐改安吉為桃州以有此也當時重

此石故以琢為石枕諸器 見皎然詩

苦山 西南四十里

輿地記云此山高二百丈周三十里遊者苦其峻極

故名

金石山 西南三十五里

高一萬八千尺廣三百里山多黃石赤土

雞罩山 西南三十里下同

石新郎山石新婦山

橫龍洞 西南四十五里

上有飛瀑懸巖

大帝山 西南五十里下同

在天目龍王廟後出於天目之側香不突其巖也

石門山 山有石門

內有獅子巖高二百丈

黃沙嶺 西南七十里

千丈巖 西南八十里

獨松關

在孝豐於潛之間建炎三年金酋完顏宗弼自安吉進兵過此歎曰南朝可謂無人若以羸兵數百守此吾豈能度哉



入貢山 南二十里

磅礪鎮靜為四山具瞻山有尖峰縣治學宮皆面之  
有天井石洞洞可容數百人有朱砂洞高二尺闊六  
尺深不可測以竹竿採取紅礫如硃故名

大谿山 南三十里

高八百五十丈周四十五里

廣茗山 南三十里

即天目之陰別起峰岫多生茗草茗水出焉蘇子瞻  
表忠觀碑以茗水出於天目之陽者不究其源也

古浮石洞 南五十里

朱紹興閒有僧智光得龍牙於此因結不朽菴名為

龍牙洞

京山 縣東南五里

碎石嶺 東南十里

浮玉山 東南十五里

此即古浮石洞也上有普惠寺生有異獸狀如猴四  
耳虎身牛尾音如犬吠其名曰彘

宋郡守葛勝仲有路出古浮山木杪飛華屋之詩只  
此

南嶼山

與浮玉相屬其高亦三萬六千丈其上有白水池一  
名白水山中多蘭草

古浮山

在南嶼之南石能浮水有洞深窅下有普慈寺

塞前山

在化度寺後上有石碁盤

上俞嶺下俞嶺

馬駒嶺

鳳皇山

東山

在鳳皇之北峭拔南來為縣之左上有竹陽泉四時

不同

喝仙嶺

武春嶺

紫阮嶺

佛嶺

高壚嶺

倒石陽

長阮陽

七賢陽

五峰山

相傳樵采見二人弈因名其鄉以表之故又名弈山

泥墓嶺

目連陽

靈巖

上有小龍池下有百福院

堂子嶺

縣北一里

大隴

北二里

張家陽

北七里

虎山

北三十里

在安吉州境險峻不可越成化閒致仕縣丞許芳鑿山麓通道以便往來大司馬彭公澤以分巡行部贈

詩嘉之

師高山

北五十里

上有積雪炎月不消山之高寒如是

南華山

西北十五里

敢山

康山

獅子山

西北三十里

大會山

玉華山

西北六十里

金曜山

金曜與玉華相對封吏部考功司郎中吳松葬此吳氏世居其下好德而文科第不絕

塔子嶺

西北十里

郭笑山

西北二十里

金雞嶺

西北三十里

調風嶺

西北五十里 下同

橫山

吳氏有先世墓

太陽山

縣西十里

大嶺

西二十里

石門隴

西三十里

涼風洞

西八十里

石岐山

西六十里

又名金峰山在金曜山之後吳氏所居處相聯接

武康縣山

紫山

縣西五里

又名銀山一名永安

響應山

西十里

隨人聲大小相應故有大響小響之名下有龍湫水色正碧名玉石響又名大響巖前有小泓名小響貞元中于頔改玉石響為碧玉潭于頔葛勝仲皆有題刻有定光院在巖腹中小池上有濯纓亭又有一壑軒院後緣石磴抵谷中有斷崖瀑布二十餘丈下有漱玉亭

餘英嶺

西十五里

餘英之源出此梁沈氏族居之處後有五峰如屏

深峴山 西二十里

山下有流水深數十丈

場山 西二十里

山墟名謂場氏居此

茹芝山 西二十里

上皋山 西三十里

車巖山

石桂山 西三十里

高大山

范鵠山 西五十里

石城山 縣西南三里

高九十六丈廣四十五里其上平衍可城可耕巔有池不盈畝大旱不竭昔人嘗於此壘石為營上有尙書左僕射姚顥墓及吳太常姚信墓

石嶠山 西南七里

山頂有石嶠長丈餘下有石嶠邨

中山 西南二十里

馬頭山 西南二十七里

佛坐山 西南二十里

馬頭鵠 西南二十五里

晉咸和七年石勒將韓雍寇吳興詔遣中郎將趙引敗之於馬頭鵠只此

箬峴山 西南三十五里

山產箭箬俗名箬嶺

龍口山 縣南十八里下同

前邨山

千人山 南二十里

金山 南三十里

高一百三十丈廣十八里土色正赤上有泉

孤山 縣東南十五里

秀峰山 東南十里

馬山 東南二十里

本防風氏所都後以夏王禹南巡至此而名宋太師

楊和王存中墓

湖上山 東南二十五里

天根山 東南三十里

計籌山 東南三十五里

越大夫計然於此籌國計其中有巖幽窟而夷曠曰

白石洞天其下有計邨或許然所居也山有昇玄觀

元鄭元祐宿通玄觀詩褰衣度松聲泉石滋斜照采  
薇入山阿白雲起巖微仙人駕青牛冷然下虛峭  
漱鼓春風空歌發微妙摩麟觴玉醴服之五情療前  
林忽暝色海月涌圓嶠天高帝清寒萬里入遐眺嗟  
哦玄通闕磴道歸蘿葛孫  
登勞我思木杪夏長嘯

翔鳳山 東南三十里下同

金牛山

黃山

鳳尾山 東南十里

煙霞鳴 縣下七里

寶谿劉穎士秀叔之別墅也林麓之勝號稱洞天中有龜巖有亭曰藏春巖前瀑水下灌巖谷聲激如雷有橋亭名挂雲

宋直祕閣鄂岳安撫大使成無玷墓在此

石協山

天將雨此山必雲上巖有石井雲所從出也

宴山 東十里

雲岫山 東十里

封山 東十里

防風氏所封之地天寶六年改名防風山上有風公

洞祠又名風渚山

秋山 東十里

楊家山 東二十里

烏卜山 東二十里

龍山 東二十里

豸山 東二十里

在風渚湖中 縣西北十五里亦有豸山

鳳皇山 五里

山下有皇覺寺晉吏部尙書沈嘉墓

南山 縣東北十三里

沈壁山 東北十五里

山有九峰透池相接沈氏自東陽徙居於此

仙臺山 東北十八里

餘英志謂黃初平煉丹處山頂有臺臺北有逍遙堂

羊沒山

在仙臺之北亦以初平故事俗譌為楊梅山

黃隴山 東北二十五里

山墟名亦附會初平之迹俗呼為王母山按初平在

金華山中修道今載於此不知何據

壩頭山 東北十八里

獨蒼山 東北三十里下同

葛官山

小山

鳳翹山 東北十八里

獅山 東北九里

烏回山 縣北三里

即平田小山也

鳳唼山 北五里下同

餘英志云其山有三一在北首枕郭林谿為鳳唼一在縣東北懷德里為鳳翹一在縣東南千佛寺側為

鳳尾



獨孤山

世傳唐獨孤及嘗宰是邑作亭其上故名

几山

東有莊井歲旱灌田不涸

竹孤山

北十里

金山

北十五里下同

一名金車頂其土赤色山巖有泉產魚如金色談志

云昔有人夜見山頂有光如鐙鑿之得金數百斤故

名

郭林山

晉郭文隱處也此山在安吉與山連界故名同

青山

馬鞍山

宋朝議大夫劉士英衣冠墓在此劉仕太原通判金

人入寇死節

招賢山

縣西北七里

山麓有毛公醴泉

白鵠山

西北十里

大高六十五里一名鵲山

銅官山

西北五里

山下有兩坎名銅井深數丈方圓百丈即吳王采銅

之所并旁有石燕洞天寶六年改名武康山

雙髻山 西北二十里下同

石山 西北二十里下同

南齊書云沈道虔隱居於此有石山精廬

天泉山 西北三十五里

一名唐錐山山麓有泉涓涓不竭陰注田閒賴以常

稔以為天之所賜故名

計峴山 西北二十五里下同

山與烏程界

仰面山 嶺大夫關士

石頭山

莫干山

上有劍池磨劍石為武康八景之一

首 德清縣山

官莊山

有大理丞何彥猷墓

司馬山

有宋翰林學士方淑墓

馬鞍山

有宋知樞密院沈與求墓

積穀山 縣西二里下同

有保慶寺

玉塵山

有白石洞天

文墅山 西十里 下同

文林山

有紫極觀

吳憾山 縣西南 一里

相傳吳王夫差憾句踐之傷其父舉兵伐越築壘於此

唐李光弼偏將辛孜亦築城於此以平朱覃姚廷等賊吳越王又築此屯戍號奉國城今隔谿名城南界首名奉國

市亭山 縣南 一里

按德清在三國時名臨水後併入餘杭後又併入武康後又改爲臨谿其在宋齊之間正併入餘杭時故德清之市亭山卽爲餘杭之舍亭山也王敬弘隱居吳興之舍亭山卽此也郡志誤以臨水爲臨安臨安在山中未嘗臨水且臨水後爲臨谿可攷見矣



赤土山

相傳昔有望氣者謂此山有貴人氣因斷後山今馬尾河是也

丁山 南三 里

望洛山

南二十里

入東記云永嘉中洛人過江者昇此山以望洛因名

吳羌山

縣東南一里

吳羌避亂於此人以名之其麓有乾元寺其陰爲龜谿其南有元峰觀梁武帝書釋迦寶殿四字柳公權大中乾元之寺張卽之書大明光閣四字其陽有沈麟士墓皎然有題吳羌山破寺詩

見文苑

德清山

縣東四里

一名烏山山墟名云烏巾居此後改德清因縣名也山有兩峰前曰殿子後曰省山

東衡山

有趙子昂墓史官歐陽玄撰神道碑

東主山

縣東北三里

陳書云侯景圍臺城右軍將軍沈恪爲東主山主晝夜與其徒拒戰以功封東興侯而名之其東有五子

石又名百寮山

張來儀登百寮山詩湖鄉風景三秋後佛界軒亭四望開碧水番從城裏過青山直到縣門來魚商酒市晴偏集釣艇蓮舟晚共回自古登高能作賦坐中誰是昔賢才

茅山

縣北十五里下同

蠡山

因范蠡得名

葛山

縣北十八里

上有葛公壇

敢三山 東北二十一里

山有三峰其中曰敢山左曰龍山右曰鳳山其下有漾或云吳闕澤曾居此因名

囚女山 東北三十五里

高十丈周四十五里入東記云後漢青州刺史姚恢與海昏侯沈戎卜居柯田山恢女是戎子婦密報戎戎先居之姚因囚女於此三世不復養女山東有漾亦名囚女漾今人改山名為齊眉山

石壁山 縣北一里

一名百寮山與東主相聯此則稍北也巉絕不可登

其陽有慈相寺寺有月泉東萊讀書於此

下坦山 北八里

金紫山 北十八里

郡人丁氏葬此贈金紫光祿大夫因名

下蘭山

縣之舊治在此天寶中始遷於百寮之陽

張家山

宋右丞相吳潛葬此

金鵝山 縣西北五里

漢述善侯沈戎葬其下有金鵝飛集三鳴而去因名其下三邨為上初鳴中初鳴下初鳴以表異也梁沈

麟士述祖德碑在此宋濠祐閒別少師葬此改名金

龍山

大肚嶺 西北八里

有范仲淹所撰寧海軍節度掌書記沈嚴墓誌

方山 西北十里

宋兵部尚書沈介葬此

吳興掌故集卷之十

